





飲水詩詞集序

余既哀容若詩詞付之梓人刻既成謹泚筆而爲之序曰嗟乎謂造物者而有意於容若也不應奪之如此其速謂造物者而無意於容若也不應畀之如此其厚豈一人之身故有可解不可解者耶容若與余爲異姓昆弟其生平有死生之友曰顧梁汾梁汾嘗言人生百年一彈指頃富貴草頭露耳容若當思所以不朽吾亦甚思所以不朽容若者夫立德非旦暮可期立功又未可預必無已試立言乎而言之僅僅



以詩詞傳則非容若意也并非梁汾意也語云非窮
愁不能著書古之人欲成一家之言網羅編葺動需
歲月今容若之才得於天者非不最優而有章服以
束其體有職守以勞其生復不少假之年俾得殫其
力以從事於儒生之所爲噫嘻豈真以昇之者奪之
而其所不可解者卽其所可解者耶梁汾從京師南
來每與余酒闌燈炮追數往事輒相顧太息或泣下
不可止憶容若素矜慎不輕爲文章極留意經學而
所爲經解諸序從未出以相示此卷得之梁汾手授

其詩之超逸詞之雋婉世共知之而其所以爲詩詞
者依然容若自言如魚飲水冷煖自知而已區區痛
惜之私欲不言不忍姑述其大略如是云時康熙辛
未秋仲古燕張純修書於廣陵署之語石軒





飲水詩集卷上

長白性德著

原名成德

錫山顧貞觀閱定

五言古詩

擬古



煌煌古京洛昭代盛文治日余餐霞人簪紱忽如寄
微尚竟莫宣修名期自致榮華及三春常恐秋節至
學仙既蹉跎風雅亦吾事

二

相彼東田麥春風吹嫋嫋過時若不治瓜蔓同枯槁

飲水詩集 卷一
天道本杳冥。人謀苦不早。荒廬日盱坐。百慮依春草。
四顧何茫然。凝思失昏曉。

三

乘險歎王陽。叱馭來王尊。委身置岐路。忠孝難并論。
有客齋黃金。誤投關西門。凜然四知言。清白貽子孫。

四

客從東方來。叩之非常流。自云發扶桑。期到海西頭。
白日當中天。浩蕩三山秋。迴風忽不見。去逐靈光遊。
燭龍莫掩照。使我心中愁。

五

天門詖蕩蕩。翕輶羅星躔。白日矚微躬。假翼令飛騫。
平生紫霞心。翻然向凌烟。雙吹鳳笙歇。宛轉辭羣仙。
越影籥浮雲。橫出天駟前。玉繩耿中夜。帝車何時旋。

六

曠然成獨立。片月相古今。睠茲西北樓。斜暉鳴玉琴。
清影忽以去。悵惘予何心。

七

竹生本孤高。儵然自植立。矯矯雲中鶴。翱翔何所集。

飲水詩集
卷一
八
丈夫故豁達身世何汲汲外物信非意潦倒翻成泣
瞻彼嶺頭雲扶疎被原隰延佇當重陰西風吹衣急

九
寒沙連雲起遙空白雁落之子方從軍深閨竟寂寞
天遠豈知返路阻長河絡北風吹瘦馬鐵衣不堪着
從軍日未久朱顏鏡中削悠悠復悠悠人生胡不樂

十
妾如三春花君如二月風澹澹從東來吹作天桃紅
一朝從軍行令人歎飛蓬何似雲間月清輝千里同

十一
天地忽如寄人生多苦辛何如但飲酒邈然懷古人
南山有閒田不治委荆榛今年適種豆枝葉何莘莘
豆實既可採豆藟亦可薪

十二
宇宙何蕩蕩皇天亦安知屈平放江潭子胥乃鴟夷
升沉本偶然遇合寧有時千古恨如此徒爲弔者悲
微生亦何幸勗哉邁昌期

三月燕已來清陰杏子落春風在青草吹我度城郭
道逢貴公子銀鞍紫絲絡籍草展華茵相邀共盃酌
爲言相見歡殷勤費酌酢久之語漸洽禮數少脫略
初誇身手好漫叙及勛爵惜哉君卿才何事失宦學
予咲但飲酒日暮風沙惡走馬東西別歸路烟漠漠

十三

余生未三十憂愁居其半心事如落花春風吹已斷
行當適遠道作計殊汗漫寒食青草多薄暮烟冥冥
山桃一夜雨茵箔隨飄零願餐紅玉草一醉不復醒

十四

松生知何年積鐵立一碧其上無女蘿其下遠荆棘
何用託孤根蒼崖多白石亦有青蘭花吐芬在其側

十五

美人臨殘月無言若有思含顰但斜睇吁嗟憐者誰
予本多情人寸心聊自持浩歌幽蘭曲援琴終不怡
私恨託遠夢初日照簾帷

十六

安石負盛名乃在衡門初名僧旣接席妙伎亦同車

仕進良偶然年已四十餘軍國事方棘圍碁看捷書
所以絲竹歡陶寫待桑榆晚造泛海裝始志終不渝
馬策西州門想像生存居君看早達者懷抱竟何如
十七
涼風颯然至秋雨滿空堦室有積憂人所思在天涯
蟋蟀鳴北牖蛛絲落高槐明發出門望爽氣正西來
西山有澗阿肥遯以爲懷

十八

生本蒲柳姿回飈任西東心如秋潭水夕陽照已空

落花委波文天地如飄蓬忽佩紫金魚予心何夢夢
不如葺茅屋種竹栽梧桐貴賤本自我榮辱隨飛鴻
何哉阮步兵慷慨泣途窮

十九

客遺緗綺棊言是雷霄斲能啼空山猿亦飛秋澗瀑
援之發古調三奏不成曲朱絃淡無味余亦那免俗

二十

白雲本無心卷舒南山巔遙峰如夢中孤影相與還
忽然間高霞霏霏欲成烟風花落不已流輝轉可憐

皎潔自多愁况復對下弦高樓夜已半惜此不成眠
二十一
歲星不在天大隱金馬門微言亦高論一一感至尊
文園苦愁病凌雲氣蕭瑟乘傳威始伸諫獵情彌切
所爲一卷書乃待身後出

二十二

西漢有賈生卓犖真奇士齋志終未達盛年身竟死
爲文弔屈平可憐湘江水忤俗謝助貴輕生答知己
臨風忽搔首吾亦從逝矣

二十三

鳳翔幾千仞羽儀在寥廓結巢梧桐頂層雲覆阿閣
非無青琅玕不寄西飛鶴一鶴正西飛翩翩長苦饑
玉潭照清影獨自刷毛衣生得謝虞羅光彩非所希

二十四

初日淡楊柳對之何所言東風幾千里吹入十二門
天地忽如寤青草招迷魂堂堂復堂堂春去將誰論

二十五

世運倏代謝風節棄已久罄折投朱門高談盡畎畝

言行清濁間術工乃逾醜人生若草露營營苦奔走
爲問身後名何如一杯酒行當向酒泉竹林呼某某
時有西風來吹香滿罌缶不問今何時臨風但搔首

二十六

宛馬精權奇歟從西極來蹴踏不動塵但見烟雲開
天閑十萬匹對此皆凡材傾都看龍種選日登燕臺
却瞻橫門道心與浮雲灰但受伏櫪恩何以異駑駘

二十七

春風解河冰咸里多歡娛置酒坐相招鼓瑟復吹竽

而我出郭門望遠心煩紆垂鞭信所歷舊壘啼饑鳥
吁嗟獻納者誰上流民圖一騎紅塵來傳有雙羽書
慷慨欲請纓沉吟且踟躕終爲孤鳴鶴奮翥凌雲衢

二十八

落日忽西下長風自東來天地果何意逝水去不回
世事看奕碁劫盡昆明灰長安羅冠蓋浮名良可哀
不如巢居子遁跡從蒿萊

二十九

行行重行行分手向河梁持杯欲勸君離思激中腸

努力飲此酒無爲居者傷

三十

長安游俠子黃金視如土
結交及屠博安知重圭組
一朝列華筵羞與朱履伍
惜哉意氣盡委身逐傾吐
時俗尚唯阿至人亦偃僂
惟昔有贈言深藏乃良賈

三十一

閉關謝西域漢文何優柔
聖澤逾亥步遐荒如甸侯
旅獒旣充貢越雉亦見收
蠻族進珊瑚不煩使者求
昭回雲漢章燭及海外州
人生觀盛事豈羨乘槎遊

三十二

聖主重文學清時無隱淪
遂令拂衣者還爲棄繻人
適意聊復爾去來若無因
昔采西山薇今憶淞江莼

三十三

結廬依深谷花落長閉關
日出衆鳥去良久孤雲還
迴風送疎雨微芬扇幽蘭
白日但靜坐坐對門前山
生世多苦辛何如日間閒

三十四

與君昔相逢乃在苧蘿村
相逢卽相別後期安可論

揚蛾啓玉齒聲發已復吞詎絕賞音者其如一顧恩
三十五

信陵敬愛客舉世稱其賢執轡過市中爲壽監門前
邯鄲解圍日韃矢引道邊救趙適自危故國從棄捐
功成失去就始覺心茫然再勝却秦軍遭讒竟誰憐
趣歸不善後作計非萬全博徒賣漿者名字亦不傳
惜哉所從遊中詎無神仙飲酒雖達生辟穀乃長年

三十六

積雪在房櫳新月光欲凝照地若無迹娟娟破初暝

明燈遲我友攬裘坐開徑人生何茫茫卽事偶成興
南飛有烏鵲遶樹棲不定持杯欲問之東風吹酒醒
三十七

魏闕有浮雲陰茲白日暮返景下銅臺歌聲發紈素
流輝如有情千載照長路漳河不西還百川盡東赴
時哉不可失讜言思所悟雨後望西陵蔓草縈古墓
安得爲飄風永吹連理樹

三十八

彩虹亘東方照耀不知晚川長組練明關塞若在眼

我友肯從征三歲胡不返邊馬鳴蕭蕭落日照沙苑
封侯固有時寄語加餐飯

三十九

吾憐趙松雪身是帝王裔神采照殿庭至尊歎昉麗
少年疎遠臣侃侃持正議才高興轉逸敏妙擅一切
旁通佛老言窮探音律細鑒古定誰作真偽不容諦
亦有同心人閨中金蘭契書畫掩文章文章掩經濟
得此良已足風流渺難繼

四十

朔風吹古柳時序忽代續庭草萎已盡顧視白日速
吾本落拓人無爲自拘束侷儻寄天地樊籠非所欲
嗟哉華亭鶴榮名反以辱有客歎二毛操觚序金谷
酒空人盡去聚散何局促攬衣起長歌明月皎如玉

聖駕臨江恭賦

黃幄臨大江山川借顏色鯨鯢久已盡不待天弧射
按圖識要汛懷古討遺跡帆檣擒虎渡營壘佛狸壁
時清非恃險何事限南北却上妙高臺悠悠天水碧

虎阜

孤聳一片石却疑誰家園烟林晚逾密草花冬尚繁
人因警蹕靜地從歌吹喧一泓劍池水可以清心魂
金虎旣銷滅玉燕亦飛翻美人與死士中夜相爲言

江行

木落江已空清輝澹鷗鷺不見繫纜石寒潮沒瓜步
帆移青楓林人歸白沙渡似有山猿啼窈然瀟湘暮
平原過漢樊侯墓

雲龍會影響駕馭從豁達樊侯鼓刀人時來遂揮喝
一望重瞳營再排隆準闡良平信美好對此氣應奪

斯人在層泉猶勝懦夫活

桑榆墅同梁汾夜望

朝市競初日幽棲閒夕陽登樓一縱目遠近青茫茫
衆鳥歸已盡烟中下牛羊不知何年寺鐘梵相低昂
無月見村火有時聞天香一花露中墜始覺單衣裳
置酒當前簷酒若清露涼百憂茲暫豁與子各盡觴
絲竹在東山懷哉詎能忘

爲王阮亭題戴務旃畫

心與西山清坐對西山雪山空多幽響芳草久云歇

白雲如滄洲縹緲不可越丹青意何長宛此山徑折
臥遊失所見空林一片月

暮春別嚴四蓀友

高雲媚春日坐覺魚鳥親可憐暮春候病中別故人
鶯啼花亂落風吹成錦茵君去一何速到家垂柳新
芙蓉湖上月照君垂長綸

送施尊師歸穹窿

突兀穹窿山丸丸多松栢造化鍾靈秀真人爰此宅
真人號鐵竹鶴髮長生客天風吹羽輪長安駐雲鳥

偶然懷故山獨鶴去無跡地偏宜古服世遠忘朝夕
空壇松子落小洞野花積蒼崖採紫芝丹竈煮白石
簷前一片雲卷舒何自適他日再相見我鬢應垂白
願此受丹經冥心鍊金液

寄朱錫鬯

萍梗忽南北相聚復相離去年一相見正值落花時
秋風苦催歸轉眼歲已期淅淅秋葉落綿綿秋夜遲
開戶見殘月道遠有所思丈夫故慷慨此別何凄其
明發攬塵鏡新寒生鬢絲

早春雪後同姜西溟作

西山雪易積北風吹更多欲尋高士去層冰鬱嵯峨
琉璃一萬片映徹桑乾河耳目故以清苦寒其如何
朝鴉背城來晴旭滿岩阿春泥凍尚合九衢交鳴珂
忽覩新歲華履端布陽和不知題柱客誰和郢中歌
送梁汾
西窓涼雨過一燈乍明滅沉憂從中來綿綿不可絕
如何此際心更當與君別南北三千里同心不得說
秋風吹蓼花清淚忽成血

題李空同詩卷和王黃湄韻

李侯卓犖人骨體本不媚貂璫燄屢觸全生偶然遂
昌言勗友朋贈答不無謂想其詩成時良亦自矜貴
果得身後名譏讒復何畏

峻龍與經岩叔夜話

絕域當長宵欲言冰在齒生不赴邊庭苦寒寧識此
草白霜氣空沙黃月色死哀鴻失其羣凍翮飛不起
誰持花間集一燈羶帳裏

宿龍泉山寺

餽水詩集 卷上
招提偶然到再宿離喧雜列岫霽始開雙扉晚初闔
禪心投鉢龍梵響下簷鴿旣閒陵闕望亦謝主賓答
遙夜一燈深石爐燒艾蒨

輓劉富川

人生非金石胡爲年歲憂有如我早死誰復爲沉浮
我生二十年四海息戈矛逆萌忽萌生斬木起炎州
窮荒苦焚掠野哭聲啾啾墟落斷炊烟津梁絕行舟
片紙入西粵連營倏相投長吏或奔竄城郭等廢丘
背恩寧有義降賊竟無羞予聞空太息嗟彼巾幗儔

黯澹金臺望蒼茫桂林愁卓哉劉先生浩氣凌斗牛
投軀赴清川噴薄萬古流誰過汨羅水作賦從君遊
白雲如君心蒼梧遠悠悠

野鶴吟贈友

鶴生本自野終歲不見人朝飲碧溪水暮宿滄江濱
忽然被繒繳矯首盼青雲僕亦本狂士富貴鴻毛輕
冲舉道無由幡然逐華纓動止類循墻戢身避高名
憐君是知己習俗苦不更安得從君去心同流水清

七言古詩

填詞

詩亾詞乃盛比興此焉託往往歡娛工不如憂患作
冬郎一生極憔悴判與三閭共醒醉美人香草可憐
春鳳蠟紅巾無限淚苾鞵心事杜陵知祇今惟賞杜
陵詩古人且失風人旨何怪俗眼輕填詞詞源遠過
詩律近擬古樂府特加潤不見句讀參差三百篇已
自換頭兼轉韻

送馬雲翎歸江南

側身宇宙間長嘯久獨立之子我友人南歸事蓑笠

交情如谷風澹澹復習習吹君度江去片帆春雨濕
棄捐世所悲予獨爲君喜君歸葺屋南山裏燕麥青
青纔覆雉新鶯啼過眠未起笑看我輩紅塵死

題趙松雪畫鵲華秋色卷

歷下亭邊兩拳石不似江南好山色乍看落日照來
黃渾疑劫火燒將黑更無楓橘點清秋惟見蕭蕭白
楊白君爲此山令山好空翠俄從楮間滴知君著意
在明湖掩映山光若有無曲折似還通灤口蒼茫定
不屬城隅鯉魚風高網罟集彷彿漁唱來菰蒲一竿

我欲隨風去不信扁舟是畫圖

新晴

新晴暖風吹柔莢綠烟如翦稻苗齊夕陽一片照長隄
隔林殘雨猶淒淒柳外如聞驄馬嘶柳絲帶雨拂深閨
誰家少婦最高梯凝情空怨錦江西

又贈馬雲翎

岿峩最高山山氣蒸爲雲物本相感生相感乃相親
吁嗟人生不可擬君南我北三千里一朝傾蓋便相歡
兩人心事如江水君身似是秋風客身輕欲奮凌

霄翮語君無限傷心事終古長江江月白世事紛紛
等飛絮我今潦倒隨所寓惟願飲酒讀君詩花前醉臥
夢君去

長安行贈葉訥菴庶子

長安舊是帝王宅萬戶千門麗金碧歌鐘甲第盡王侯
繡幃雕鞍照長陌紛紛入眼競繁華春日春光好誰
惜春風初吹上林草一夜雪深山盡老雪花飛來大如
席化作新泥徧周道角聲嗚嗚破早烟驚鴉飛去未明
天青樓綺閣不卷簾玉河凍合層冰堅只疑

此際行人絕寧知槐柳森成列經過借問此爲誰云
是東南貴遊客嗟哉人生何不齊清者如雲濁者泥
忽憶崑山葉夫子磊磊落落隨所棲羨君著書窮歲
月羨君意氣凌雲霓世無伯樂誰相識驂駟日暮空
長嘶我亦憂時人志欲吞鯨鯢請君勿復言此道棄
如遺聞道西山有瑤草何不同君一采之

送蓀友

人生何如不相識君老江南我燕北何如相逢不相
合更無別恨橫胸臆留君不住我心苦橫門驪歌淚

如雨君行四月草萋萋柳花桃花半委泥江流浩淼
江月墮此時君亦應思我我今落拓何所止一事無
成已如此平生縱有英雄血無由一濺荆江水荆江
日落陣雲低橫戈躍馬今何時忽憶去年風雨夜與
君展卷論王霸君今偃仰九龍間吾欲從茲事耕稼
芙蓉湖上芙蓉花秋風未落如朝霞君如載酒須盡
醉醉來不復思天涯

柳條邊

邊牆也以柳
爲之在塞外

是處垣籬防絕塞角端西來畫疆界漢使今行虎落

中秦城合築龍荒外龍荒虎落兩依然護得當時飲
馬泉若使春風知別苦不應吹到柳條邊

飲水詩集卷下

長白性德著

原名成德

錫山顧貞觀閱定

五言律詩

扈從 聖駕祀東岳禮成恭紀

岱宗柴望處仙蹕迴雲霄大禮猶三代諸侯第一朝
東封金牒字南指玉衡杓闕里應相近回鑾亦不遙

時傳 旨南巡回
日祀曲阜聖廟

塞外示同行者

西風千萬騎颯沓向陰山爲問傳書雁孤飛幾日還

負霜憐戍卒乘月望鄉關王事兼程促休嗟客鬢斑
金陵

勝絕江南望依然圖畫中六朝幾興廢滅沒但歸鴻
王氣倏云盡霸圖誰復雄尚疑鍾隱在回首月明空
寄梁汾并葺茅屋以招之

三年此離別作客滯何方隨意一尊酒殷勤看夕陽
世誰容皎潔天特任疎狂聚首羨麋鹿爲君構草堂
題蘇文忠黃州寒食詩卷

古今誠落落何意得斯人紫禁稱才子黃州見逐臣

風流如可接翰墨不無神展卷逢寒食標題想後塵

郊園卽事

勝侶招頻嬾幽尋度石梁地應隣射圃花不礙毬場
解帶晴絲弱披襟露葉涼此間蕭散絕隨意倒壺觴
沈進士爾燦歸吳興詩以送之

成名方得意幾日問歸舟獨有離居者蕭然感素秋
一筇黃葉寺孤棹白蘋洲無限江湖興因君寄虎頭

時梁汾
客茗上

歲晚感舊

時序忽云暮離居倍悄然誰將仙掌露換却日高眠
短夢分今古長愁減歲年平生無限淚一灑燭花前

送張見陽令江華

楚國連烽火深知作吏難吾憐張仲蔚臨別勸加餐
避俗詩能寄趨時術恐殫好名無不可聊復砥狂瀾

戒壇同見陽作

欹斜一逕入門向夕陽邊何必堪娛賞凋零自可憐
松寒疑有雪僧老不知年只合千峰上長吟看月圓

詠籠鶯

何處金衣客棲棲翠幙中有心驚曉夢無計識春風
漫逐梁間燕誰巢井上桐空將雲路翼緘恨在雕籠
夜合花同梁藥亭顧梁汾吳天章姜西溟作

堦前雙夜合枝葉敷華榮疎密共晴雨卷舒因晦冥
影隨筠箔亂香雜水沉生對此能消忿旋移近小楹

時乙丑五月下弦

五言排律

扈駕馬蘭峪賜觀溫泉恭紀十韻

御天來鳳輦浴日啓龍池野迴紆皇覽春濃值

聖時落花縈綵仗初柳拂朱旗行漏三春擁停鑾萬
象隨瑞徵泉是醴喜溢沼生芝特許觀靈液相將陟
禁堦氣凝漿五色味結露三危仙蹕程遙度慈闈駕
近移倍隆長樂養兼採廣微詩扈從誠多幸重華賞
薦辭

七言律詩

擬冬日景忠山應制

峒堯鐵鳳鎖琳宮親侍鑾輿度碧空 聖主豈因崇
象教宸游直自接鴻濛遠山雪有一峰白別浦楓餘

幾片紅天意不教常肅殺佇看宇宙徧春風

湯泉應制

清時禮樂萃朝端次第郊原引玉鑾河岳千年歸帶
礪寢園三月拜衣冠便從畿甸親民隱更啓神泉示
從官非獨炎陵鍾坎德恩波深處不知寒

二

六龍初駐浴蘭天碧瓦朱旗共一川潤逼仙桃紅自
舞醉酣人柳綠猶眠吹成暖律回燕谷散作薰風入
舜絃最是垂衣深 聖德不須詞筆頌甘泉

三

魚鱗雁齒鏡中開
濺沫爲霖遍九垓
不用劫灰求彷彿
便從天漢象昭回
桑壇法駕乘春轉
鶴禁仙鑪問寢來
遙祝海隅同帝澤
年年長聽屬車雷

四

身向咸池傍末光
三危露暖不成霜
金鋪照日初涵影
玉甃生烟別作香
地接蓬萊通御氣
波翻豆蔻散朝涼
微臣幸屬賡歌日
願借如川獻壽觴

秋日送徐健菴夫子歸江南四首

江楓千里送浮颺
玉佩朝天此暫辭
黃菊承杯頻自覆
青林繫馬試教騎
朝端事業留他日
天下文章重往時
聞道至尊還側席
栢梁高宴待題詩

二

玉殿西頭落暗颺
迴波寧作望恩辭
蛾眉自是從相妬
駿骨由來豈任騎
白首盡爲酬遇日
青山真奈送歸時
嚴裝欲發頻相顧
四始重拈教詠詩

三

不同紈扇怨涼颺
咫尺重華好薦辭
衡嶽鴈排迴日

字葛陂龍待化來騎斑斕正好稱觴暇絲竹誰從著
展時弱植敢忘春雨潤一生長誦角弓詩

四

惆悵離筵拂面颺幾人鸞禁有宏辭魚因尺素殷勤
剖馬爲鄣泥鄭重騎定省暫應紆遠望行藏端不負
清時春風好待鳴騶入不用淒涼錄別詩

卽日又賦

商飈獵獵帝城西極目平沙草色齊一夜霜清林葉
下五原秋迥塞鴻低相將綠酒浮萸菊莫向黃雲聽

鼓輦此日登高兼送遠欲歸還聽玉驄嘶

再送施尊師歸穹窿

紫府追隨結願深日歸行色乍駸駸秋風落葉吹飛
鳥夜月橫江照鼓琴歷劫飛沉寧有意孤雲去住亦
何心貞元朝士誰相待桃觀重來試一尋

題竹爐新詠卷

并序

惠山聽松庵竹茶爐歲久損壞甲子秋梁汾
做舊製復爲之置積書巖中諸名士作詩以
紀其事是冬余適得一卷題曰竹爐新詠則

明時王舍人孟端李相國西涯所爲竹爐詩
畫並在寔聽松故物也喜以歸梁汾卽名其
巖居曰新詠堂因次原韻

爐成卷得事天然乞與幽居置坐邊
掩映芙蓉亭下月依稀斑竹嶺頭烟
畫如董巨真高士詩在成弘極
盛年相約過君同展看淡交終始似山泉

五言絕句

秋意

片雲銜日去疎雨欲來時
忽見小庭中草花三兩枝

二

涼風昨夜至枕簟已瑟瑟
小女笑吹燈床頭捉蟋蟀

三

雨聲池館秋漠漠橫塘水
水鳥故窺人飛入荷花裏

題趙松雪水村圖

北苑古神品斯圖得其秀
爲問鷗波亭烟水無恙否

題胡瓌射鴈圖

人馬一時靜祇聽哀鴈音
塞垣無事日聊欲耗雄心
七言絕句

西苑雜詠和蓀友韻二十首

官花半落雨初停。早是新炎撤畫屏。何必醴泉堪避暑。藕絲風好水西亭。

二

離宮近繞綠蘋洲。冰簟銀床到處幽。好是萬幾清暇日。親持玉勒奉宸遊。

三

太液東頭散直遲。一雙水鳥掠楊枝。從臣獻罷平滇賦。坐聽中涓報午時。

四

進來瓜果每承恩。豹尾前頭拜至尊。正是日斜花雨散。傳呼聲在望春門。

五

幔展輕羅一色裁。瓊牕深映拂雲槐。重簾那得微風入。葉葉荷聲急雨來。

六

黃幄臨池白鳥飛。金盤初進鱸魚肥。太平時節多歡賞。花萼諸王半醉歸。

卷一
七

射生纔罷晚開筵十部笙笳動暝烟月上南湖波似
練幾星燈火是龍船

八

青絲蜀綿護銀塘誰許延秋報早涼縹緲蓬山應似
此不知何處白雲鄉

九

纔翻急雨暗金河曲罷催呈雜技多一自花竿身手
絕那將妙舞說陽阿

十

玉女窓扉靜不開藕花深處絕塵埃三更露坐清無
暑共待蕉園彩鷁回

十一

香引輕颺散玉除下簾聲徹退朝初馬曹此日承恩
數也逐清班許釣魚

十二

烟柳千行宿鳥多虹梁曲曲水螢過新涼却愛中元
節萬點荷燈散玉河

十三

夜深簾幙捲銀泥。十二樓高望欲迷。宮漏滴殘聞動鎖。一鈎斜月碧河西。

十四

輕雲欲傍最高樓。重露看垂白玉旒。處處紅芳零落盡。衆香國裏不曾秋。

十五

時攀御柳拂華簪。水檻行開玉一面。幾日烏龍江上去。回看北斗是天南。

十六

玲瓏朱閣擬三山上。駟門依御柳閒倦。聽月中歌吹。杳晨鳧秣罷夜分還。

十七

制勝由來仗德威。夜郎何物敢輕違。河清欲頌慚才盡。空羨儒臣賜宴歸。

十八

講帷遲日記花甄。下直歸來一惘然。有夢不離香案側。侍臣那得日高眠。

十九

不須惆悵憶江湖身入金門待漏圖中使攀來仙掌
露尊羹風味得如無

二十

花暎初陽覆綺寮玉珂雙引望中遙憑君莫作烟波
夢曾是烟波夢早朝

敬題元公張大中丞遺照二首

豸冠丰采著垂魚共擬威稜肅翦除今日拜瞻溫克
甚懸知宿好但詩書

二

憶從駒齒獎空羣執戟誰知似子雲鐘鼎旂常公不
朽好憑班范紀餘芬

上元卽事

翠毬銀鞍南陌回鳳城簫鼓殷如雷分明太乙峰頭
過一片金蓮火裏開

詠柳偕梁汾賦

烟水頻年瘦不支一生餘得許多絲靈和舊事今如
夢却到人間縮別離

二
弱絮殘鶯一半休。萬條千縷不勝愁。祇應天上張星伴。莫向青門繫紫騮。

秣陵懷古

山色江聲共寂寥。十三陵樹晚蕭蕭。中原事業如江左。芳草何須怨六朝。

題虞美人蝴蝶畫扇

寫得春風分外嬌。粉痕零落暈紅潮。曲終夢醒渾無那。同向斜陽恨寂寥。

有感

帳中人去影澄澄。澄重對年時。芳苾燈惆悵。月斜香騎散。人間何處覓韓馮。

從見陽乞秋葵種

空庭脉脉夕陽斜。濁酒盈樽對晚鴉。添取一般秋意味。墻陰不種斷腸花。

四時無題詩十八首

一樹紅梅傍鏡臺。含英次第曉風催。深將錦幄重重護。爲怕花殘却怕開。

二
挑盡銀燈月滿階立春先繡踏青鞋夜深欲睡還無
睡要聽檀郎讀紫釵

三
金鳴香輕護綺櫺春衫一色颺蜻蜓偶因失眠嬌無
力斜倚熏籠看畫屏

四
手撚紅絲凭繡床曲闌亭午柳花香十三時節春偏
好不似而今惹恨長

五
青杏園林試越羅映妝殘月曉風和春山自愛天然
妙虛費隋宮十斛螺

六
綠槐陰轉小闌干八尺龍鬚玉簟寒自把紅牕開一
扇放他明月枕邊看

七
水榭同携喚莫愁一天涼雨晚來收戲將蓮葯拋池
裏種出花枝是並頭

八

小睡醒來近夕陽鉛華洗盡淡梳粧紗幮此日偏惆
悵剪取巫雲做晚涼

九

追涼池上晚偏宜菱角雞頭散綠漪偏是玉人憐雪
藕爲他心裏一絲絲

十

却對菱花淚暗流誰將風月印綢繆生來悔識相思
字判與齊紈共早秋

十一

解盡餘醒蕪盡香雨聲蟲語兩淒涼如何剛報新秋
節便覺清宵分外長

十二

璇璣好譜斷腸圖却爲思君碧作朱幾夜西風消瘦
盡問儂還似舊時無

十三

寒香細細撲重簾日壓雕簷起未忺端的爲花憔悴
損一枝還向膽瓶添

十四

凝陰容易近黃昏
獸錦還餘昨夜溫
最是惱人風弄雪
睡醒無事總關門

十五

玉指吳鹽待剖橙
忽聽樓外馬蹄聲
問郎今日天寒甚
却是何人抵暮行

十六

是誰看月是誰愁
夜冷無端上小樓
已過日高還未起
任他鸚鵡喚梳頭

十七

漫學吹笙苦未調
嬌癡且自倚庭蕉
博山香盡殘灰冷
零落霜華帶月飄

十八

慢蒸甜香待煮茶
桃符換却已聞鴉
宿粧總待侵晨換
留取鬢心栢子花

記征人語十二首

列幙平沙夜寂寥
楚雲燕月兩迢迢
征人自是無歸夢
却枕堦燈聽晚潮

二

橫江烽火未曾收
何處危檣繫客舟
一片潮聲飛石燕
斜風細雨岳陽樓

三

樓船昨過洞庭湖
蘆荻蕭蕭宿鴈呼
一夜寒砧霜外急
書來知有寄衣無

四

旌旗歷歷射波明
洲渚宵來畫角聲
啼遍鷓鴣春草綠
一時南北望鄉情

五

青燐點點欲黃昏
折鐵難消戰血痕
犀甲玉桴今寂寞
九歌原自近招魂

六

戰壘臨江少落花
空城白日盡饑鴉
最憐陌上青青草
一種春風直到家

七

陣雲黯黯接江雲
江上都無鴈鴛羣
正是不堪回首夜
誰吹玉笛弔湘君

八
邊月無端照別離故園何處寄相思西風不解征人
苦一夕蕭蕭滿大旗

九
移軍日夜近南天薊北雲山益渺然不是啼烏銜紙
過那知寒食又今年

十
鬢影蕭蕭夜枕戈隔江清淚斷猿多霜寒畫角吹無
力歸夢秦川奈爾何

十一
一曲金笳客淚垂鐵衣閒却臥斜暉衡陽十月南來
鴈不待征人盡北歸

十二
纔歇征輦夜泊舟荻花楓葉共颼颼醉中不解雙鞬
臥夢過紅橋訪舊遊

十三
去年親串此從軍揮手城南日未曛我亦無端雙袖
濕西風原上看離羣

上元月食

夾道香塵擁狹斜
金波無影暗千家
姮娥應是羞分鏡
故倩輕雲掩素華

詠絮

落盡深紅綠葉稠
旋看輕絮撲簾鉤
憐他借得東風力
飛去爲萍入御溝

借梁汾過西郊別墅

遲日三眠伴夕陽
一灣流水夢魂涼
製成天海風濤曲
彈向東風總斷腸

又

小艇壺觴晚更携
醉眠斜照柳梢西
詩成欲問尋巢燕
何處雕梁有舊泥

爲友人賦六首

不將才思唱臨春
愛着荷衣狎隱淪
分付芙蓉湖上月
好留清影待歸人

二

夢裏誰曾與畫眉
別來幾度燕相窺
小樓日暮愁無那
折取藤花寄所思

三
往事驚心玉鏡臺分香庭院長莓苔百花深護桃源
犬不許人歌赤鳳來

四
長安北望杳茫茫泣向薰籠憶舊香惆悵玉環空寄
與紫微郎是薄情郎

五
珍重嬌鶯啄柳芽清狂曾賦壓墻花皚皚自許人如
雪何必丁寧繫臂紗

六
朝衣欲脫換輕衫無恙西風舊布帆秋入玉潭新月
冷休因索莫怨崔咸

書鮑讓侯詩後
多少才情豔綺霞羨君能賦上林花如余硯北渾無
事閒傍紅牕枕木瓜

賦得柳毅傳書圖次陳其年韻

黃陵祠廟白蘋洲尺幅圖成萬古愁一自牧羊涇水
上至今雲物不勝秋

二
花愁雨泣總無倫
憔悴紅顏畫裏真
試看劈天金鎖
去雷霆原惱薄情人

三
晶簾碧砌玉玲瓏
酒滴珍珠日未中
忽報美人天上
落寶箏筵裏盡春風

四
凝碧宮寒覆羽觴
洞庭歌罷意茫茫
玉顏寂寞今依
舊雨鬢風鬢在斷腸

柳枝詞十六首

一枝春色又藏鴉
白石清溪望不賒
自是多情便多
絮隨風直到謝娘家

二
春到江南春草生
乍驚搖曳撲簾旌
黃鸝無語昏鴉
起深閉重門待月明

三
七香車過殷輕雷
十里紅樓照水開
遙指玉鞭鞭白
馬柳陰陰下是郎來

四
水亭無事對斜陽
宛地輕陰却過牆
休折長條惹輕絮
春風何處不迴腸

五
何處纖腰不可憐
纏頭拋與沈郎錢
女兒睡覺推牕看
忽憶迎歡舊繫船

六
永豐坊裏謝啼鵲
移植紅泥曲檻邊
涼月一簾思往事
是他曾與伴無眠

七
人去樓空屬阿誰
月明惟見影垂垂
尋常已是堪愁絕
何況春來贈別離

八
何事憑闌怨月明
乍晴樓閣倚孤清
相思一夕溪流漲
倒影絲絲拂水平

九
綠到長干第幾橋
晚晴簾幙隔吹簫
前身定自輕狂甚
嫁得東風帶水飄

十

辛夷開罷絮紛紛青粉墻頭日未曛記得箇人春病
起是他縈惹綠羅裙

十一

手縮長條倚水樓困人風日懶梳頭濛濛一抹催花
雨半繫斑騅半繫舟

十二

軟風吹雪帶微香曾向珠樓掃鈿床塘上鴛鴦三十
六祇今何處月茫茫

十三

風過遊絲卷落花又隨飛絮上簷牙東鄰爲約清明
後陌上輕衫共採茶

十四

一水縈迴鴈齒橋紅泥亭搭綠絲縵潯陽縱有麻姑
信春雨春風自寂寥

十五

細細萍吹水面風百花飛盡綠陰同別離管盡人如
昨羅袖長垂玉筍紅

十六

休栽楊柳只栽桐待鳳藏鴉好盡空不見胥臺明月
夜一池黃葉但西風

上元竹枝

天上朱輪繡幃車幾看春色到梅花而今却畏春寒
甚獨掩重門自試茶

題見陽小照

雨雪山空獨悟遲羨君瀟灑出塵姿靈和別殿臨風
晚最憶春前第一枝

別蓀友口占

離亭人去落花空潦倒憐君類轉蓬便是重來尋舊
處蕭蕭日暮白楊風

又

半生餘恨楚山孤今夜送君君去吳君去明年今夜
月清光猶照故人無

題照

畫出東風別一般綠窓人靜獨憑闌就中真色圖難
就最是春山兩筆難

塞垣却寄四首

絕塞山高次第登
陰崖時見隔年冰
誰憐妙寫簪花手
却向雕鞍試臂鷹

二

千重烟水路茫茫
不許征人不望鄉
况是月明無睡夜
儘將前事細思量

三

碎蟲零葉共秋聲
訴出龍沙萬里情
遙想碧窓紅燭畔
玉纖時爲數歸程

四

枕函斜月不分明
夢欲成時那得成
一派西風連角起
寒鷄已到第三聲

別意六首

晶簾低映美人蕉
雨歇芳叢點未消
應是玉鞭歸轍晚
故來花底坐無聊

二

濃香如霧恍難尋
執燭櫻桃伴夜深
慚愧十郎歸未得
空題紅淚寄焦琴

獨擁餘香冷不勝殘更數盡思騰騰今宵便有隨風
夢知在紅樓第幾層

三

芭蕉影斷玉繩斜風送微涼透碧紗記得夜深人未
寢枕邊狼藉一堆花

四

銀屏對影自生憐正是看花中酒天剪却合歡雙帶
子一般牽恨又今年

五

茗盃香爐事事幽每當相對便無愁金籠自結雙棲
願那得題紈怨早秋

六

暮春見紅梅作簡梁汾
杏花庭院月如弓又見江梅一瓣紅知是東皇深著
意教他終始領春風

乙丑

初夏月借仲弟作

雲母窓扉夜不扃露華和月滿中庭可憐春去無多
日已怯微暄敞畫屏

龍泉寺書扇

雨歇香臺散晚霞
玉輪輕碾一泓沙
來春合向龍泉寺
方便風前檢較花

又

繡旛風定晝悄悄
證取蓮花不染心
佛法自來空色相
當年何事苦吞針



